

- पेरिस पैरालम्पिक मांय भारत री शानदार सरूआत- निशानेबाजी मांय अवनी लेखरा सोना रो अर मोना अग्रवाल कांसां रो तमगो जीत्यो ।
- मुख्यमंत्री भजनलाल शर्मा राइजिंग राजस्थान ग्लोबल इन्वेस्टमेंट समिट सारू आज मुम्बई मांय रोड शो कीनो ।
- प्रदेश रा उत्तराद हलका मांय बिरखा रो दौर जारी- -राजसमंद जिला रा नन्दसमंद बांध माथे रपट चाली ।
- केन्द्र सरकार पेंशन प्रक्रिया ने आसान बणावण सारू एकल सरलीकृत पेंशन आवेदन पत्र जारी कीनो ।

000

पेरिस पैरालम्पिक मांय भारत शानदार सरूआत कीनी है । निशानेबाजी होड मांय आज भारत सोना अर कांसा रो तमगो जीत लीनो । अवनी लेखरा महिलावां री दस मीटर एयर राइफल स्टेन्डिंग एसएच-1 होड मांय 249 दशमलव 7 अंक हासिल कर र सोना रो तमगो जीत्यो । भारत री मोना अग्रवाल ई इण ई होड मांय 228 दशमलव 7 अंक हासिल कर र कांसा रो तमगो जीत्यो । दोन्यू खिलाडी जयपुर री रेहवासी है । अवनी पैरालम्पिक मांय खुद रो ही रिकॉर्ड तोड्यो । साल 2020 मांय व्ह्या टोकियो पैरालम्पिक खेलां मांय वा 249 दशमलव 6 पॉइंट हासिल कर र पैरालम्पिक रिकॉर्ड बणायो हो । प्रधानमंत्री नरेन्द्र मोदी अवनि लेखरा ने बधाई दीनी है । एक सोशल मीडिया पोस्ट रे जरिये वे कह्यो के अवनि पैरालम्पिक खेलां मांय तीन तमगा जीतण वाळी भारत री पहली महिला एथलीट बण र इतिहास रच दीनो है । प्रधानमंत्री कांसा रो तमगो जीतण वाळी मोना अग्रवाल ने ई बधाई दीनी । राज्यपाल हरिभाऊ किशनराव बागडे अवनि लेखरा ने सोना रो तमगो जीतण परां बधाई अर शुभकामनावां दीनी है । वे जयपुर री ई पैरा निशानेबाज माथे नाज जताता थकां कह्यो के अवनि दुनिया मांय भारत रो माथो ऊंचो कीनो है । राज्यपाल भारत री ही मोना अग्रवाल ने ई कांसा रो तमगो जीतण परां खुशी जताता थकां वां ने बधाई दीनी है । वे कह्यो के आं दोन्यू री जीत महिला शक्ति री जीत है । मुख्यमंत्री भजन लाल शर्मा ई अवनि लेखरा अर मोना अग्रवाल ने बधाई दीनी है । सोशल मीडिया प्लेटफार्म माथे वे कह्यो के दोन्यू री उपलब्धियां ऊं राजस्थान समेत पूरा देश रो माथो ऊंचो व्ह्यो है ।

00000

प्रदेश मांय दिसम्बर महीना मांय व्हेवण वाळा 'राइजिंग राजस्थान' ग्लोबल इन्वेस्टमेंट सम्मेलन रे मार्फत बत्ता ऊं बत्ता निवेशकां ने राजस्थान मांय निवेश करण सारू बुलावण रा मकसद ऊं मुख्यमंत्री भजनलाल शर्मा आज मुंबई मांय रोड शो कीनो । ई पाछे खबरनवीसां सागे बातचीत करता थकां वे कह्यो के राज्य मांय निवेश ने बधावो देवण सारू सरकार हर संभव कोशिश कर रही है । मुख्यमंत्री कह्यो के राजस्थान सरकार ऊर्जा, निर्माण, आईटी, सीमेंट, अर पर्यटन सरीखा न्यारा-न्यारा हलकां मांय साढे चार लाख करोड रुपया ऊं बत्ता निवेश री योजना बणायी है ।

मुख्यमंत्री निवेशकां अर कॉर्पोरेट जगत री हस्तियां ने 9 ऊं 11 दिसंबर बीचे जयपुर मांय राख्या जावण वाळा 'राइजिंग राजस्थान' ग्लोबल इन्वेस्टमेंट सम्मेलन मांय सिरकत करण रो न्योतो दीनो ।

000

उपराष्ट्रपति जगदीप धनखड़ देश रा विकास मांय महिलावां री भागीदारी घणी जरूरी बतायी है । वे आज दिल्ली मांय "विकसित भारत में महिलाओं की भूमिका" मुद्दा माथे राखी ज्या कार्यक्रम मांय बोल रह्या हा । उपराष्ट्रपति कह्यो के भारत एक परिपक्व, परिष्कृत अर औपचारिक माली व्यवस्था बणबा ओडी तेजी ऊं बध रह्यो है । वे कह्यो के घर मांय शौचालय, रसोई गैस कनेक्शन अर नल ऊं जल कनेक्शन सरीखा बुनियादी सुबीतां ऊं जनता रो जीवन स्तर सुधर्यो है ।

00000

राज्यपाल हरिभाऊ किसनराव बागडे आज श्रीगंगानगर जिला री ऐतिहासिक हिंदुमलकोट चौकी अर सरहदी हलका रो दौरो कीनो । वे पाकिस्तान री सरहद ऊं लाग्योडी ई खास चौकी ऊं सरहदी हलका रो जायजो लीनो अर बीएसएफ रा जवानां सागे बातचीत ई कीनी । राज्यपाल वार म्यूजियम ने ई निरख्यो अर हिन्दुमलकोट गांव री जूनी अर ऐतिहासिक महत्त्व ऊं जुडी इमारतां ने ई निरखी । राज्यपाल आंतरिक सुरक्षा समन्वय समिति री मीटिंग ले र बीएसएफ अर पुलिस प्रशासन ने मिल र सरहद पार ऊं ड्रोन रे जरिये हेरोईन अर दूजी नशीली चीजां भेजी जावण ने रोकण सारू स्थानीय लोगां री मदद ऊं सावचेती सागे काम करण बाबत कह्यो । राज्यपाल हिन्दुमल कोट री सरकारी स्कूल मांय पोषाहार मुहैया करावण अर खेलकूद रा बारा मांय बच्चां सागे बातचीत कीनी । इण ऊं पैली वे प्रधानमंत्री

आवास योजना रो फायदो लेवण वाळां सागे ई बातचीत कीनी। राज्यपाल श्रीकरणपुर हलका रा कमीनपुरा मांय गंगानगर शुगर मिल रो ई दौरा कीनो अर गन्ना री उपज लेवण वाळा किसानां सागे चर्चा कीनी।

00000

प्रदेश रा न्यारा—न्यारा हलकां मांय व्हे रही बिरखा ऊं नदी नाळा मांय पाणी आवण रो सिलसिलो लगातार चाल रह्यो है। राजसमंद जिला मांय नाथद्वारा रा नंदसमंद बंध माथे चादर चाल ग्यी है। जिला रा बाघेरी नाका बंधा माथे पैली ई चादर चाल रही है। 30 फीट बूता वाळी राजसमंद झील मांय ई 17 दशमलव 30 फीट पाणी भर ग्यो है। भरतपुर मांय आज सिंज्यां व्ही बिरखा ऊं मौसम खुशगवार बण ग्यो। चूरु, बाड़मेर अर सवाईमाधोपुर मांय ई मेह रा समाचार है। ई बीचे चित्तौड़गढ़ जिला मांय डूंगला हलका रा बिलोदा गाँव रा तळाव मांय डूब जावण ऊं चार टाबरियां री मौत व्हे ग्यी। तळाव मांय डूबी टाबरियां री लाशां निकाल र डूंगला रा अस्पताल मांय रखवायी ज्यी है। सहकारिता मंत्री गौतम दक अस्पताल पूग र मामला री जाणकारी लीनी।

000000

आज राष्ट्रीय लघु उद्योग दिवस मनायी ज्यो। प्रदेश रा न्यारा—न्यारा हलकां मांय नान्हा उद्योग वां री खास पिछाण बणायी है। झुन्झुनू जिला रा सुलताना कस्बा रा कारीगर वां रा हुनर रे पाण अन्तर्राष्ट्रीय बाजार तांई पहुँच बणा लीनी है। ई हलका रा करीब एक सौ पिरवार लोहा रा तार ऊं हाथ री कारीगरी ऊं न्यारी—न्यारी चीजां बणा रह्या है जदके करीब 200 पिरवार लोहा रा बर्तन बणावण रो काम कर रह्या है। ऐ सामान बणावण मांय खास बात आ है के ई काम मांय वैल्डिंग नी करी जावे है। सुलताना रा कारीगरां रा कलात्मक सामान री बिकी इटली, फ्रांस, जर्मनी, अमेरिका, स्वीट्जरलैंड, इंग्लैंड, ऑस्ट्रेलिया, न्यूजीलैंड अर कनाडा रा बाजार मांय व्हेवण लागी है। सांचौर जिला रा लालपुरा गाँव रा बुनकर ई हाथ री कारीगरी रे जरिये स्थानीय पट्टू ने नुवा तरीका ऊं पेश कीनो है। कम्बल सरीखो पट्टू खास मौकां माथे पहर्यो जावे है। इण ने भेड़ री ऊन ऊं बणायो जावे है।

000000

पेंशन प्रक्रिया ने आसान बणावण सारू केन्द्र सरकार आज एकल सरलीकृत पेंशन आवेदन—पत्र जारी कर दीनो। भविष्य पोर्टल ने ई ई—एचआरएमएस सागे डिजिटल तरीका ऊं जोड दियो ज्यो है। कार्मिक, लोक शिकायत अर पेंशन राज्य मंत्री डॉ. जितेंद्र सिंह नई दिल्ली मांय वीडियो कॉन्फ्रेंसिंग रे मार्फत आं री सरूआत कीनी। ई मौके कार्मिक अर प्रशिक्षण विभाग रा सचिव विवेक जोशी बतायो के नौ भांत रा पेंशन फॉर्म ने मिला र नुवो एकल फॉर्म बणायी ज्यो है।

000

राज्य सरकार ने एक आदेश जारी कर आज सेवानिवृत्त हुए भारतीय प्रशासनिक सेवा के चार अधिकारियों का कार्यभार अन्य अधिकारियों को सौंपा है। पाली की संभागीय आयुक्त प्रतिभा सिंह को जोधपुर के भंवर लाल मेहरा के सेवानिवृत्त होने पर जोधपुर संभागीय आयुक्त का अतिरिक्त प्रभार दिया है। उदयपुर के संभागीय आयुक्त राजेंद्र भट्ट के सेवानिवृत्ति पर उनका कार्यभार टीएडी कमिश्नर प्रज्ञा केवलरामानी को दिया गया है। महिला और बाल विकास विभाग के सचिव डॉ. मोहन लाल यादव के सेवानिवृत्त होने पर उनके विभाग का जिम्मा अब शुचि त्यागी को सौंपा गया है। इसी तरह आईएएस अधिकारी चित्रा गुप्ता के सेवानिवृत्त होने पर स्कूल शिक्षा और पंचायती राज विभाग के विशेष सचिव का कार्यभार विश्व मोहन शर्मा को दिया गया है।

000

सवाईमाधोपुर जिला मांय रणथंभौर बाघ परियोजना हलका रा गोपालपुरा गाँव कने जंगली जिनावरां रा हमला रे कारण दो जणा ज़ख्मी व्हे ग्या। ज़ख्मी लोगां ने बहरावंडा खुर्द रा सामुदायिक स्वास्थ्य केंद्र मांय ले जायी ज्या, जठे ऊं वां ने सामान्य अस्पताल सारू रेफर कर दिया ज्या।

000

निर्वाचन विभाग प्रदेश मांय दिव्यांगजन री चुनाव मांय भागीदारी आसान बणावण सारू वोटर लिस्टां मांय दिव्यांगता री जाणकारी दर्ज करण अर मतदाता पहचान—पत्र जारी करण सरीखा न्यारा—न्यारा सुबीता मुहैया करावण सारू थर्ड पार्टी ऑडिट करावेला। मुख्य निर्वाचन अधिकारी नवीन महाजन ई बाबत् अहलकारां ने ज़रूरी हुकम दीना है।

वे दिव्यांगजन सारू चलायी जा रही खास स्कूलां अर दूजी स्कूलां ऊं दिव्यांग विद्यार्थियां री लिस्ट हासिल कर र 18 साल या बत्ती उम्र वाळा विद्यार्थियां रा नाम वोटर लिस्टां मांय मांडण रा हुकम ई दीना।

00000

शिक्षा अर पंचायती राज मंत्री मदन दिलावर आज रामगंजमंडी कने मोड़क गाँव मांय जनता री समस्यावां सुणी अर मौके ई वां रा निपटारा रा हुकम दीना। इण ऊं पैली शिक्षा मंत्री पैली खैराबाद मांय करीजी जन सुणवाई मांय मिली शिकायतां रा निपटारा सारू करी ज्या जतन री जाणकारी लीनी। भरतपुर मांय संभागीय आयुक्त सांवरमल वर्मा जन सुणवाई कर र अहलकारां ने जनता री समस्यावां निपटावण सारू अहलकारां ने ज़रूरी हुकम दीना।

00000

राष्ट्रीय खेल दिवस रा सिलसिला मांय पत्र सूचना कार्यालय जयपुर मांय ई न्यारा-न्यारा कार्यक्रम राख्ही ज्या। ई दौरान पत्र सूचना कार्यालय अर केन्द्रीय संचार ब्यूरो जयपुर री अपर महानिदेशक ऋतु शुक्ला अहलकारां अर कर्मचारियां ने फिटनेस री शपथ दिरायी। ई मौके टेनिस बॉल क्रिकेट, फुटबॉल, बैडमिंटन, रस्साकसी अर नींबू रेस सरीखी न्यारी-न्यारी होड़ां राख्ही ज्यी अर जीतण वाळां ने ईनाम दे नवाजी ज्या। जालौर रा शाह पूंजाजी गेनाजी स्टेडियम मांय राष्ट्रीय खेल सप्ताह-2024 रा तहत आज टेबल टेनिस, दौड़ , कबड्डी अर वुशू री होड़ां राख्ही ज्यी। 26 अगस्त ऊं चाल रह्यो खेल सप्ताह काल पूरो व्हेला।

00000

भरतपुर मांय रोजगार कार्यालय री ओर ऊं आज रोजगार मेळो लगायी ज्यो। मेळा मांय चार सौ ऊं बत्ता नौजवानां ने नौकरी सारु चुण्णी ज्या। श्रम अर रोजगार महकमा रा उपनिदेशक राजकुमार मीणा बतायो के रोजगार शिविर मांय 9 गैर सरकारी कंपनियां 900 बेरोजगार उम्मीदवारां रा इंटरव्यू कीना।

000000